

Kerajaan Terus Lindungi Hak Pekerja - Subramaniam mStar Online

Oktober 06, 2011

Oleh ARIFFUDDIN ISHAK

KUALA LUMPUR: Kerajaan tidak akan menindas pihak pekerja di negara ini sebaliknya akan terus melindungi kebajikan mereka menerusi Rang Undang-undang Kerja (Pindaan) 2011 yang akan dibentangkan di Dewan Rakyat bagi bacaan kali kedua pada Khamis.

Menteri Sumber Manusia, Datuk Dr S. Subramaniam berkata, dari masa ke masa, pihaknya sentiasa mengadakan perbincangan bersama dengan pelbagai kesatuan sekerja termasuk Kongres Kesatuan Sekerja Malaysia (MTUC) berhubung masalah yang dihadapi oleh tenaga kerja di negara ini.

"Walaupun kita membuat beberapa pindaan terhadap Akta Pekerjaan 1955, ia bukan bermakna kita tidak menjaga kepentingan pekerja sebaliknya ia (pindaan) bertujuan untuk melindungi mereka.

"Apa yang disuarakan oleh kesatuan sekerja sebelum ini, semuanya diambil kira oleh pihak kementerian sebelum kita membuat pindaan...apa yang kerajaan buat adalah untuk kepentingan pekerja di negara ini," katanya di bangunan Parlimen di sini, Khamis.

Beliau berkata demikian pada sidang media selepas mengadakan pertemuan bersama kepimpinan MTUC, yang dihadiri Presidennya, Mohd Khalid Atan dan Setiausaha Eksekutif Kesatuan Kebangsaan Pekerja Ladang (NUPW), A. Navamukundan.

Sementara itu, Subramaniam berkata, pihaknya juga akan meneliti secara terperinci cadangan bagi membolehkan pekerja asing turut menyertai kesatuan sekerja.

"Tiada masalah untuk pekerja asing menyertai kesatuan sekerja kerana ketika ini kira-kira 10,000 pekerja asing di sektor perladangan sudah menjadi ahli NUPW.

"Kemungkinan selepas ini, boleh diperluaskan ke sektor lain...kitatidak menentang perkara ini kerana ia juga adalah salah satu usaha untuk menjaga kebajikan pekerja," katanya.

Dalam pada itu, Khalid berkata, pihaknya menyambut baik perkara itu dan sedia berbincang dengan kementerian bagi merealisasikan hasrat berkenaan.

"Masih belum ada sebarang kata putus mengenainya, tapi kita akan terus berbincang agar ia dapat dilaksanakan," katanya.

Hakcipta Terpelihara © 1995-2011 Star Publications (Malaysia) Bhd

Source: http://mstar.com.my/berita/cerita.asp?file=/2011/10/6/mstar_berita/20111006133931&sec=mstar_berita